

尾蔗叢談

玉壺記

齊推女傳

王賈傳



玉

壺

記

撰人不詳

中華書局

此據古今說海本
排印初編各叢書
僅有此本

玉壺記

說淵二十四

元和初有元胤柳實者。居于衡山。二公俱有從父。爲官嗣右。李旌人連累。各竄于愛州。二公共結行邁而往省焉。至于廉州合浦縣。登舟而欲越海。將抵交趾。艤舟於合浦岸。夜有村人饗神。簫鼓諠譁。舟人與二公僕使齊往看焉。夜將半。俄飄風歛起。斷纜漂舟。入于大海。莫知所適。突長鯨之鬐。搶巨鼉之背。浪浮雪嶠。日湧火輪。觸蛟室之梭。停。擣蜃樓而瓦解。擺簾數四。幾欲傾沉。然後抵孤島而風止。二公愁悶而陟焉。以見天王尊像。瑩然于嶺所。有金鑄香爐而別無人物。二公周覽。次忽覩海面上巨獸。出首四顧。若有察聽。牙森劍戟。目閃電光。良久而沒。遂巡復有紫雲自海面湧出。蔓衍數百步。中有五色大芙蓉。高百餘尺。葉葉而綻。內有帳幄。若繡綺錯雜。耀奪人眼。又見虹橋忽展。直抵於島上。俄有雙鬟侍女。捧玉合。持金爐。自蓮葉而來。天尊所。易其殘燼。炷以異香。二公見之。前告叩頭。辭理哀懇。求送人世。雙鬟不答。二公請益苦。良久。女曰。子是何人而遽至此。二公具以實白之。女曰。少頃有玉虛尊師。常降此島。與南溟夫人會約。子但堅請之。將有所遂。言訖。有道士乘白鹿。馭彩霞。直降于島上。二公前拜而泣告。尊師憫之。言曰。子可隨此女而謁南溟夫人。常有歸期。無以礙矣。尊師語雙鬟曰。余暫修真。畢當詣彼。二子受教。至帳前行拜謁之禮。見一女未髻。衣五色文彩。皓玉凝肌。紅粧艷絕。神出天表。氣肅滄溟。二子告以姓字。夫人哂之曰。

昔時天台有劉晨。今有柳實。昔有阮肇。今有元胤。昔時有劉阮。今有元柳。莫非天也。設二榻而坐。俄命侍女歌舞。雅合節奏。二子恍忽。若夢于鈞天。卽人世罕聞見矣。遂命飛觴。忽有玄鶴銜彩牋。自空而至。曰。安期生知尊師赴南溟會。暫請枉駕。尊師讀之。謂玄鶴曰。尋常至彼。尊師語夫人曰。與安期生間闕千年。不值南遊。無因訪語。夫人遂促侍女進饌。玉器光潔。夫人對食。而二子不得餉。尊師曰。二子雖未合餉。然爲求人間之食而餉之。夫人曰。然。卽別進饌。乃人間味也。尊師食畢。懷中出丹篆一卷。授夫人。夫人拜而受之。遂告去。迴謂二子曰。子有道。歸乃不難。然邂逅相遇。合有靈藥相貺。子但宿分自有師。吾不當爲子師耳。二子拜。尊師遂去。俄海上有武夫。長數丈。衣金甲。仗劍而進。曰。奉使天真。清道不謹。法當顯戮。今已行刑。遂趨而沒。夫人命侍女紫衣鳳冠者。曰。可送客去。而所乘者何。侍女曰。有百花橋可馭。二子感謝拜別。夫人贈以玉壺一枚。高尺餘。夫人命筆題玉壺詩贈曰。來從一葉舟中來。去向百花橋上去。若到人間扣玉壺。鴛鴦自解分明語。俄有橋長數百步。闌檻之上。皆有異花。二子於花間潛窺。見千龍萬蛇。遽相緣遶爲橋之柱。又見昔海上獸。已身首異處。浮于波上。二子因詰使者。使者曰。此獸爲不知二客故。口使者曰。我不常爲使而送子。蓋有深意欲奉託。強爲此行。遂襟帶間解一琥珀合子。中有物隱隱若蜘蛛形狀。謂二子曰。吾輩水仙也。水仙陰也。而無男子。吾昔遇番禺少年。情之至感。遂有子。未三歲合藥之。夫人命與南岳神爲子。其來久矣。聞南岳迴鴈使者有事于水府。返日憑寄吾子所弄玉環。往而使者隱之。吾頗爲恨。望二君子爲持此合子至迴鴈峯下。訪使者廟而投之。常有異變。卽得玉環。爲送吾子。吾子亦當

自有報効耳。慎勿啓之。二子受之。謂使者。夫人詩云。若到人間扣玉壺。鴛鴦自解分明語。何也。曰。子歸有事。但扣玉壺。當有憑而應之。事無不從矣。又曰。玉虛尊師云。吾輩自有師。師復是誰。曰。南岳太極先生耳。二子及回岸詢時。已一十二年矣。驩愛二州親屬已殂謝矣。問道將歸衡山。中途因餒而扣壺。遂有鴛鴦語。曰。常欲飲食。前行自遇耳。俄而道左有盤饌豐備。二子食而數日不思他味。尋卽達家。昔日童稚已弱冠矣。然二子妻各謝世數年。家人輩悲喜不勝。曰。人云卽君已沒大海。服闋已九秋矣。二子情厭人世。體以清虛。視妻之喪。不甚悲感。遂相與直抵迴鴈峯。訪使者廟。以合子而投之。條有黑龍長數丈。激風噴電。折樹揭屋。霹靂一聲。而廟立碎。二子戰慄不敢熟視。空中乃有擲玉環者。二子取之而送岳廟。及歸。有黃衣少年持二合子。各到二子家。曰。中有藥。若有斃者。雖一甲子。猶可塗其口中。俄頃則活。授之而使者不見。二子遂以活妻室。後共尋雲水。訪太極先生。而杳無影響。可問。却歸因大雪。見老叟肩樵而鬻。二子哀其衰邁。飲之以酒。視樵擔上有太極字。遂禮而爲師。以玉壺告之。叟曰。吾貯玉液者。亡來數十甲子。甚喜再見。二子因隨詣祝融。自此而得道。不復見矣。